

四庫全書

史部

欽定四庫全書

明史卷三百

大學士張廷玉等奉 敕修

列傳第一百八十八

外戚

明太祖立國家法嚴史臣稱后妃居宮中不預一髮之政外戚循例謹度無敢恃寵以病民漢唐以來所不及而高文二后賢明抑遠外氏太祖訪得高后親族將授

以官后謝曰國家爵祿宜與賢士大夫共之不當私妾
家且援前世外戚驕佚致禍為辭帝善后言賜金帛而
已定國之封文皇后謂非已志臨終猶勸帝毋驕畜外
家詒謀既遠宗社奠安而枏房貴戚亦藉以保福慶逮
子孫所全不已多乎惟英宗時會昌侯孫繼宗以奪門
功參議國是自茲以下其賢者類多謹身奉法謙謙有
儒者風而一二怙恩負乘之徒所好不過田宅狗馬音
樂所狎不過俳優伎妾非有軍國之權賓客朋黨之勢

而在廷諸臣好為危言激論汰如壽寧兄弟庸駑如鄭國秦已逐影尋聲抨擊不遺餘力故有明一代外戚最為孱弱然而惠安新樂舉宗殉國嗚呼卓矣成祖后家詳中山王傳餘採其行事可紀者作外戚傳

陳公

馬公

呂本

馬全

張

麒

子景昇等

胡

榮

孫

忠

子繼宗

吳安

錢貴

汪泉

杭昱

周能

子壽
或

王鎮

子

源等

萬貴

邵喜

張巒

夏儒

陳萬言

方銳

陳景行

李偉

王偉

鄭成憲

王昇

劉文炳 弟文耀等

張國紀

周奎

陳公逸其名淳皇后父也洪武二年追封揚王媪為王夫人立祠太廟東明年有言王墓在財貽者中都守臣按之信帝乃命中書省即墓次立廟設祠祭署奉祀一人守墓戶二百一十家世世復帝自製揚王行實諭翰林學士宋濂文其碑畧曰王姓陳氏世維揚人不知其諱當宋季名隸尺籍伍符中從大將張世傑扈駐南海

至元己卯春世傑與元兵戰師大潰士卒多溺死王幸
脫死達岸與一二同行者累石支破釜煮遺糧以療饑
已而絕糧同行者聞山有死馬將共烹食之王疲極晝
睡夢一白衣人來曰汝慎勿食馬肉今夜有舟來共載
也王未之深信俄又夢如初至夜將半夢中彷彿聞櫓
聲有衣紫衣者以杖觸王膝曰舟至矣王驚寤身已在
舟工見舊所事統領官時統領已降於元將元將令來
附者輒擲棄水中統領憐王藏之艙板下日取乾餈從

板隙投之王掬以食復與王約以足撼板王即口號從
板隙受漿居數日事洩傍惶不自安颶風吹舟盤旋如
轉輪久不能進元將大恐統領知王善巫術遂白而出
之王仰天叩齒若指揮鬼神狀風濤頓息元將喜因飲
食之至通州送之登岸王歸維揚不樂為軍伍避去盱
眙津里鎮以巫術行王無子生二女長適季氏次即皇
太后晚以季氏長子為後年九十九薨遂葬焉今墓是
已臣濂聞君子之制行能感於人固難而能通於神明

為尤難今當患難危急之時神假夢寐挾以升舟非精誠上通於天何以致神人之佑至於斯也舉此推之則積德之深厚斷可信矣是宜慶鍾聖女誕育皇上以啟億萬年無疆之基於乎盛哉臣瀛既序其事復再拜稽首而獻銘曰皇帝建國克展孝思疏封母族自親而推錫爵維揚地通帝畿立廟崇祀元冕袞衣痛念宅兆卜之何墟閭師來告今在盱眙皇情悅豫繼以涕洟即以禮官汝往葺治毋俾蕘豎跳踉以嬉惟我揚王昔隸戎

麾擗風蕩海糧絕阻饑天有顯相夢來紫衣挾以登舟
神力所恃易死為生壽躋期頤積累深長未究厥施乃
毓聖女茂衍皇支蘿圖肇開鴻祚我魏日照月臨風行
霆馳自流徂源功亦有歸無德弗酬典禮可稽聿昭化
原扶植政基以廣孝治以淳民彝津里之鎮王靈所依
於昭萬年視此銘詩

馬公逸其名高皇后父也宿州人元末殺人亡命定遠
與郭子興善以季女屬興後歸太祖即高皇后也公

及妻鄭媪皆前卒洪武二年追封徐王媪為王夫人建
祠太廟東皇后親奉安神主祝文稱孝女皇后馬氏謹
奉皇帝命致祭四年命禮部尚書陶凱即宿州瑩次立
廟帝自為文以祭文曰朕惟古者創業之君必得賢后
以為內助共定大業及天下已安必追崇外家以報其
德惟外舅外姑實生賢女正位中宮朕既追封外舅為
徐王外姑為王夫人以王無繼嗣立廟京師歲時致祭
然稽之古典於禮未安又念人生其土魂魄必遊故鄉

故即瑩所立廟俾有司春秋奉祀茲擇吉辰遣禮官奉安神主於新廟靈其昭格尚鑒在茲二十五年設祠祭署奉祀祀丞各一人王無後以外戚武忠武聚為之置灑掃戶九十三家永樂七年北巡親謁祠下守塚武戡為建陽衛鎮撫犯法責而宥之十五年帝復親祭以戡為徐州衛指揮僉事

呂本壽州人懿文太子次妃父也任元為元帥府都事復歸太祖授中書省令史洪武五年歷官吏部尚書六

年改太常司卿明年四月御史臺言本奉職不謹郊壇牲角非繭粟功臣廟壞不修詔免官罰役功臣廟已釋為北平按察使僉事帝召本及同時被命楊基達魯與權諭之曰風憲之設在肅紀綱清吏治非專理刑名爾等往修厥職務明大體毋效俗吏拘繩墨善雖小為之不己將成全德過雖小積之不己將為大愆不見干雲之臺由寸土之積燎原之火由一爇之微可不慎哉本等頓首受命尋復累遷太常司卿逾二年卒無子賜奠

鍾山之陰

馬全洪武中光祿寺少卿其女乃惠帝后也燕兵陷都城全不知所終

張麒永城人洪武十六年以女為燕世子妃授兵馬副指揮世子為太子進京衛指揮使尋卒永樂九年追封彭城伯謚恭靖後進侯二子景昇並昭皇后兄也景從成祖起兵取大寧戰鄭村壩俱有功授義勇中衛指揮同知已援薊州敗遼東軍還佐世子守北平永樂初累

官錦衣衛指揮使晁嘗有過成祖戒之曰戚畹最當守法否則罪倍常人汝今富貴能不忘貧賤驕逸何自生若奢傲放縱陵虐下人必不爾恕慎之晁頓首謝仁宗立擢中軍都督府左都督俄封彭城伯子孫世襲洪熙改元命掌五軍右哨軍馬英宗嗣位年幼太皇太后召晁兄弟誠諭之凡朝政弗令預晁兄弟素恭謹因訓飭益自斂正統三年卒長子輔病發子瑾嗣以伯爵封輔命未下而輔卒初晁私蓄奄人瑾匿不舉事發下獄已

獲釋瑾從弟玘天順中官錦衣衛副千戶飲千戶呂宏
家醉抽刀刺宏死法當斬有司援議親未減詔不從迄
如律成化十六年瑾卒子信嗣其後裔嗣封見世表昇
字叔暉成祖起兵以舍人守北平有功授千戶歷官府
軍衛指揮僉事永樂十七年從北征仁宗即位拜後府
都督同知宣德初進左都督掌左府事四年二月敕諭
昇曰卿舅氏至親日理劇務或以吏欺謾連不問則廢
法問則傷恩其罷府事朝朔望官祿如舊稱朕優禮保

全之意九年北征命掌都督府事留守京師英宗立太
皇太后令勿預政大學士楊士奇稱昇賢宜加委任終
不許正統五年兄景已前卒太后念外氏惟昇一人封
惠安伯子世襲明年卒子軫早亡孫琮嗣琮卒弟瑛嗣
瑛卒無子庶兄瓚嗣瓚卒子偉嗣弘治十二年充陝西
總兵官鎮守固原明年五月孝宗御平臺出兵部推舉
京營大將疏歷詢大學士劉健等僉稱偉才命提督神
機營御書敕以賜正德元年令參英國公張懋保國公

朱暉提督團營三年加太子太保六年二月充總兵官
偕都御史馬中錫督京兵討流賊劉六等朝議以偉擁
兵自衛責其玩寇殃民召還御史吳堂復劾其罪兵部
請逮偉及中錫下獄論死遇赦獲釋停祿閒住十年請
給祿詔給其半十五年復督神機營嘉靖初兼提督團
營二年叙奉迎防守功加太子太傅十四年卒贈太傅
謚康靖子鏞嗣二十年言官劾勛戚權豪家置店房科
私稅諸罪鏞亦預輸贖還爵二十七年掌後府事居三

年卒從子元善嗣隆慶四年僉書後府事萬曆三十七年卒子慶臻嗣四十八年掌左府事崇禎元年七月命提督京營慶臻私請內閣增於教內兼管捕營捕營提督鄭其心訐慶臻侵職帝怒詰改勅故大學士劉鴻訓至遣戍慶臻以世臣停祿三年後復起掌都督府十七年賊陷都城慶臻召親黨盡散貲財闔家自燔死南渡時贈太師惠安侯謚忠武合祀旌忠祠初世宗嘉靖八年革外戚世爵惟彭城惠安獲存慶臻卒殉國難

胡榮濟寧人洪武中長女入宮為女官授錦衣衛百戶
永樂十五年將冊其第三女為皇太孫妃擢光祿寺卿
子安為府軍前衛指揮僉事專侍太孫不泄事後太孫
踐阼妃為皇后安亦屢進官宣德三年后廢胡氏遂不振
孫忠字主敬鄒平人初名愚宣宗改曰忠初以永城主
簿督夫營天壽山陵有勞遷鴻臚寺序班選其女入皇
太孫宮宣宗即位冊貴妃授忠中軍都督僉事三年皇
后胡氏廢貴妃為皇后封忠會昌伯嘗謁告歸里御製

詩賜之命中官輔行比還帝后臨幸慰勞妻董夫人數
召入宮賜賚弗絕正統中皇后為皇太后忠生日太后
使使賜其家時王振專權祭酒李時勉荷校國學門忠
附奏曰臣荷恩厚願效李祭酒使為臣客坐無祭酒臣
不歡太后立言之帝時勉獲釋忠家奴貸子錢於濱州
民規利數倍有司望風奉行民不堪訴諸朝言官交章
劾之命執家奴戍邊忠不問景泰三年卒年八十五贈
會昌侯謚康靖英宗復辟加贈太傅安國公改謚恭憲

成化十五年再贈太師左柱國子五人繼宗顯宗紹宗
續宗純宗純宗官錦衣衛指揮僉事早卒繼宗字光輔
章皇后兄也宜德初授府軍前衛指揮使改錦衣衛景
泰初進都指揮僉事尋襲父爵天順改元以奪門功進
侯加號奉天翊衛推誠宣力武臣特進光祿大夫柱國
身免二死子免一死世襲侯爵諸弟官都指揮僉事者
俱改錦衣衛復自言臣與弟顯宗率子胥家奴四十三
人預奪門功乞加恩命由是顯宗進都指揮同知子璉

授錦衣衛指揮使壻指揮使武忠進都指揮僉事蒼頭
輩授官者十七人五月命督五軍營戎務兼掌後軍都
督府事左右又有為紹宗求官者帝召李賢謂曰孫氏
一門長封侯次皆顯秩子孫二十餘人悉得官足矣今
又請以為慰太后心不知初官其子弟時請於太后數
請始允且不懌者累日曰何功於國濫授此秩物盛必
衰一旦有罪吾不能庇矣太后意固如此賢稽首頌太
后盛德因從容言祖宗以來外戚不典軍政帝曰初內

侍言京營軍非皇舅無可屬太后實悔至今賢曰侯幸
淳謹但後此不得為故事耳帝曰然已錦衣逮杲奏英
國公張懋太平侯張瑾及繼宗紹宗並侵官地立私莊
命各省實懋等具服乃宥之典莊者悉逮問還其地於
官石亨之獲罪也繼宗為顯宗武忠及子孫家人軍伴
辭職帝止革家人軍伴之授職者七人餘不問五年曹
欽平進太保尋以疾奏解兵柄辭太保不允憲宗嗣位
命繼宗提督十二團營兼督五軍營知經筵事監修英

宗實錄朝有大議必繼宗為首再覈奪門功惟繼宗侯如故乞休優詔不許三年八月實錄成加太傅十年兵科給事中章鑑疏言繼宗久司兵柄尸位固寵亟宜罷退以全終始於是繼宗上疏懇辭帝優詔許解營務仍蒞後府事知經筵預議大政復辭帝不許免其奏事承旨自景泰前戚臣無典兵者帝見石亨張輒輩以營軍奪門故使外戚親臣參之非故事也又五年卒公八十

五贈剡國公謚榮襄再傳至曾孫景詳世表中

吳安丹徒人父彥名有女入侍宣宗於東宮生景帝宣德三年冊為賢妃彥名已卒按安錦衣衛百戶景帝嗣位尊妃為皇太后安進本衛指揮使屢遷前府左都督弟信亦屢擢都督僉事景泰七年封安安平伯信早亡官其弟敬為南京前軍左都督英宗復辟太后復稱賢妃降安為府軍前衛指揮僉事敬及其羣從南京錦衣衛指揮僉事智府軍前衛指揮同知喜山指揮僉事林廣錦衣衛千戶誠俱革職原籍閒住尋命安為錦衣衛

左二上巳下
卷三百
指揮使子孫世襲

錢貴海州人英宗睿皇后父也祖整從成祖起兵為燕山護衛副千戶父通嗣職官至金吾右衛指揮使貴嗣祖職數從成祖宣宗北征屢遷都指揮僉事正統七年后將正位中宮擢貴都督同知英宗數欲封之后輒遜謝故后家獨不獲封貴卒長子欽為錦衣衛指揮使與弟鍾俱歿於土木欽無子以鍾遺腹子雄為後年幼以父故秩予優給天順改元擢都指揮使成化時累

擢都督同知后崩憲宗優生母外家周氏而薄錢氏故后家又不獲封雄卒子承宗亦屢官錦衣衛都指揮使弘治二年承宗祖母王氏援憲宗外家王氏例請封乃封承宗安昌伯世襲先是勛臣莊田租稅皆有司代收至是王氏乞自收始命願自收者聽而禁管莊者橫肆嘉靖四年承宗卒謚榮僖子維圻嗣尋卒承宗妻請以庶長子維垣嗣詔授錦衣衛指揮使已又請嗣伯爵世宗以外戚世封非祖制下廷臣議八年十月上議曰祖宗

之制非軍功不封洪熙時都督張景封彭城伯弟昇亦封
惠安伯外戚之封自此始循習至今有一門數貴者歲
糜厚祿踰分非法臣等謹議魏定二公雖係戚里實佐
命元勳彭城惠安二伯即以恩澤封而軍功參半其餘
外戚恩封毋得請襲有出特恩一時寵錫者量授指揮
千百戶之職終其身制曰可命魏定彭城惠安襲封如
故餘止終本身著為令維垣遂不得襲以錦衣終

汪泉世為金吾左衛指揮使家京師正統十年其子瑛

有女將冊為邸王妃授瑛為中城兵馬司指揮食祿不
視事妃正位中宮進泉都指揮同知府軍衛帶俸瑛錦
衣衛指揮使尋並擢左都督瑛弟亦授錦衣千戶有差
英宗復位泉仍居金吾舊職瑛錦衣舊職其四弟皆奪
官還故里尋命瑛錦衣指揮僉事子孫世襲

杭昱女為景帝妃生子見濟景泰三年帝欲廢英宗子
而立己子乃廢皇后汪氏冊妃為后昱累官錦衣衛指
揮使兄聚授錦衣千戶聚尋卒賜賻及祭奠七年后崩官

卷三百
其弟敏錦衣百戶英宗復辟盡奪景帝所授外親官尤
惡杭氏乃降昱為副千戶尋卒敏削職還里

周能字廷舉昌平人女為英宗妃生憲宗是為孝肅皇
太后英宗復位授能錦衣衛千戶賜賚甚渥能卒長子
壽嗣職憲宗踐祚擢左府都督同知成化三年封慶雲
伯贈能慶雲侯壽以太后弟頗恣橫時方禁勦戚請乞
莊田壽獨冒禁乞通州田六十二頃不得已與之嘗奉
使道呂梁洪多挾商艘主事謝敬不可壽與閹且劾之

敬坐落職十七年進侯子弟同日授錦衣官者七人能
追贈太傅寧國公謚榮靖孝宗立壽加太保時壽所賜
莊田甚多其在寶坻者已五百頃又欲得其餘七百餘
頃詭言以私財相易部劾其貪求無厭執不許孝宗竟
許之又與建昌侯張延齡爭田兩家奴相毆交章上聞
又數撓鹽法侵公家利有司厭苦之十六年加太傅弟
長寧伯或亦加太保兄弟並為侯伯位三公前此未有
也武宗立汰傳奉官壽子姪八人在汰中壽上章乞留

從之正德四年卒贈宣國公謚恭和子瑛嗣封殖過於
父嘉靖中於河西務設肆邀商貨虐市民虧國課為巡
按御史所劾停祿三月而瑛怙惡如故又為主事翁萬
達所劾詔革其廩肆下家人於法司時已革外戚世爵
瑛卒遂不得嗣或太后仲弟也成化時累官左府都督
同知二十一年封長寧伯世襲弘治中外戚競營私利
或與壽寧侯張鶴齡至聚衆相鬪都下震駭九年九月
尚書屠浦偕九卿上言憲宗皇帝詔勦戚之家不得占

據關津陂澤設肆開廛侵奪民利違者許所在官司執
治以聞皇上踐極亦惟先帝之法是訓是遵而勛戚諸
臣不能格守先詔縱家人列肆通衢邀截商貨都城內
外所在有之觀永樂間榜例王公僕從二十人一品不
過十二人今勛戚多者以百數大乖舊制其間多市井
無賴冒名罔利歸羣小怨叢一身非計之得適者長
寧伯周或壽寧侯張鶴齡兩家以瑣事忿爭喧傳都邑
失戚里之觀瞻損朝廷之威重伏望綸音戒諭俾各修

舊好凡有店肆悉皆停止更敕都察院揭榜禁戒擾商賈奪民利者聽巡城巡按御史及所在有司執治仍考永樂間榜例裁定勛戚家人不得濫收科道亦以為言帝嘉納之十八年進太保或求為侯吏部言封爵出自朝廷無請乞者乃止武宗立悉擢或子塘等六人為錦衣官或尋卒傳子塘孫大經及曾孫世臣降授錦衣衛指揮同知先是孝肅有弟吉祥兒時出遊去為僧家人莫知所在孝肅亦若忘之一夕夢伽藍神來言后弟今

在某所英宗亦同時夢且遣小黃門以夢中言物色得之報國寺伽藍殿中召入見后且喜且泣欲爵之不可厚賜遣還憲宗立為建大慈仁寺賜莊田數百頃其後周氏衰落而仁慈寺莊田久猶存

王鎮字克安上元人憲宗純皇后父也成化初授金吾左衛指揮使未幾后將正位中宮拜中軍都督同知四年進右都督鎮為人厚重清謹雖榮寵不改其素有長者稱十年六月卒弘治五年追封阜國公謚康穆子三

人源清濬源字宗本后弟也父卒授錦衣衛都指揮使
外戚例有賜田源家奴怙勢多侵靜海縣民業十六年
給事中王垣等言永樂宣德間許畿輔八郡民盡力墾
荒永免其稅所以培國本重王畿也外戚王源賜田初
止二十七頃乃令其家奴別立四至占奪民產至二千
二百餘頃及貧民赴告御史劉喬徇情曲奏致源無忌
憚家奴益橫今戶部郎中張禎叔等再按得實迄自原
額外悉還民并治喬罪帝不悅切責之後詔禁外戚侵

民產源悉歸所占於民人多其能改過十八年擢中軍都督同知二十年封瑞安伯弘治五年進侯十六年加太保武宗登極進太傅增祿至七百石嘉靖三年卒贈太師謚榮靖清成化十八年授錦衣衛千戶累官中軍都督同知弘治十年封崇善伯武宗嗣位加太保嘉靖十三年卒濬成化十八年授錦衣衛百戶兄清每遷職輒以濬代歷官中軍左都督正德二年封安仁伯踰月卒贈侯濬兄弟三人並貴顯皆謙慎守禮在戚里中以

賢稱源子橋濬子桓皆嗣伯嘉靖中并清子極皆以例
降革

萬貴諸城人憲宗萬貴妃父也歷錦衣衛指揮使貴頗
謹飭每受賜輒憂形於色曰吾起掾史編尺伍蒙恩
備戚屬子姓皆得官福過災生未知所終矣時貴妃方擅
寵貴子喜為指揮使與弟通達等並驕橫貴每見諸子
屑越賜物輒戒曰官所賜皆著籍他日復宣索汝曹將
重得罪諸子笑以為迂成化十年卒贈賻祭奠有加十

四年進喜都指揮同知通指揮使達指揮僉事通少貧賤業賈既驟貴益貪黷無厭造竒巧邀利中官韋典梁芳等復為左右每進一物輒出內庫償輦金錢絡繹不絕通妻王出入宮掖大學士萬安附通為同宗婢僕朝夕至王所謁起居妖人李孜省輩皆緣喜進朝野苦之通死帝眷萬氏不已遷喜都督同知達指揮同知通庶子方二歲養子方四歲俱授官憲宗崩言官劾其罪狀孝宗乃奪喜等官而盡追封誥及內帑賜物如貴言

邵喜昌化人世宗大母邵太后弟也世宗立封喜昌化伯明年卒子蕙嗣嘉靖六年卒無子族人爭嗣初太后入宮時父林早歿太后弟四人宗安宣喜宗宣無後及蕙卒帝令蕙弟萱嗣蕙姪錦衣指揮輔千戶茂言萱非嫡派不當襲蕙母爭之議久不決七年大學士張璉等言邵氏子孫已絕今爭者皆旁枝不宜嗣時帝必欲為喜立後乃以喜兄安之孫杰為昌化伯會明倫大典命武定侯郭勛頒賜戚畹弗及杰杰自請之帝詰勛勳

怒錄邵氏爭襲章奏訐杰實他姓請覆勘不聽八年
給事中陸粲論大學士桂萼受杰賂使奴隸冒封爵帝
怒罷萼相而盡革外戚封杰亦奪襲

張巒興濟人敬皇后父也弘治三年封壽寧伯五年進
侯卒贈昌國公子鶴齡嗣侯十六年其弟延齡亦由建
昌伯進爵侯巒起諸生雖貴盛能敬禮士大夫鶴齡兄
弟並驕肆縱家奴奪民田廬募獄囚數犯法帝遣侍郎
屠勳太監蕭敬按得實坐奴如律敬復命皇后怒帝亦

佯怒已而召敬曰汝言是也賜之金給事中吳世忠主
事李夢陽皆以劾延齡幾得罪他日帝遊南宮鶴齡兄
弟入侍酒半皇后皇太子及鶴齡母金夫人起更衣因
出遊覽帝獨召鶴齡語左右莫得聞遙見鶴齡免冠首
觸地自是稍斂迹正德中鶴齡進太傅世宗入繼鶴齡
以定策功進封昌國公時敬皇后已改稱皇伯母昭聖
皇太后矣帝以太后抑其母蔣太后故銜張氏嘉靖十
二年延齡有罪下獄坐死并革鶴齡爵謫南京錦衣衛

指揮同知太后為請不得初正德時日者曹祖告其子
鼎為延齡奴與延齡謀不軌武宗下之獄將集羣臣廷
鞫之祖仰藥死時頗以祖暴死疑延齡而獄無左證遂
解指揮司聰者為延齡行錢負其五百金索之急遂與
天文生董景子至謀訐祖前所首事脅延齡賄延齡執
聰幽殺之令聰子昇焚其屍而折所負券昇噤不敢言
常憤詈至至慮事發乃撫聰前奏上之下刑部逮延齡
及諸奴雜治延齡嘗買沒官第宅造園池僭侈踰制又

以私憾殺婢及僧事并發覺刑部治延齡謀不軌無驗而違制殺人皆實遂論死繫獄四年獄囚劉東山發延齡手書訕上東山得免戍又陰搆奸人劉琦誣延齡盜宮禁內帑所告連數十百人明年奸人班期于雲鶴又告延齡兄弟挾左道祝詛辭及太后鶴齡自南京赴逮瘐死期雲鶴亦坐誣謫戍又明年東山以射父亡命為御史陳讓所捕獲復誣告延齡并搆讓及遂安伯陳鏞等數十人冀以悅上意而脫己罪奏入下錦衣衛竊治

讓獄中上疏言東山扇結奸黨圖危宮禁陛下有帝堯
既睦之德而東山敢為陛下言漢武巫蠱之禍陛下有
帝舜底豫之孝而東山敢導陛下以暴秦遷母之謀離
間骨肉背逆不道義不可赦疏奏帝頗悟指揮王佐典
其獄鉤得東山情奏之乃械死東山赦讓鏗等而延齡
長繫如故太后崩之五年延齡斬西市

夏儒毅皇后父也上元人正德二年封慶陽伯為人長
厚父瑄疾三年不去左右既貴服食如布衣時見者不

知為外戚也十年以壽終子臣嗣伯嘉靖八年罷襲

陳萬言肅皇后父也元城人起家諸生嘉靖元年授鴻

臚卿改都督同知賜第黃華坊明年詔復營第於西安

門外費帑金數十萬工部尚書趙璜以西安門近大內治

第毋過高帝怒逮營繕郎翟璘下獄言官余瓚等諫不

省尋封萬言泰和伯子紹祖授尚寶司丞又明年萬言

乞武清東安地各千頃為莊田詔戶部勘間地給之給

事中張漢御言萬言拔跡儒素聯婚天室當躬自檢飭

為戚里倡而僭冒陳乞違越法度去歲深冬沍雪急起
大第徒役疲勞怨咨載道方今災沴相繼江淮餓死之
人掘穴掩埋動以萬計萬言曾不動念益請莊田小民
一廛一畝終歲力作猶不足於食若又割而畀之貴戚
欲無流亡不可得也伏望割恩以義杜漸以法一切裁
抑令保延爵祿帝竟以八百頃給之巡撫劉麟御史任
洛復言不宜奪民地弗聽七年皇后崩萬言亦絀十四
年卒子不得嗣封

方銳世宗孝列皇后父也江寧人后初為九嬪銳授錦衣正千戶嘉靖十三年張后廢后由妃冊為皇后遷銳都指揮使扈蹕南巡道拜左都督既封安平伯尋進封侯卒子承裕嗣隆慶元年用主事郭諫臣言罷襲

陳景行穆宗繼后陳皇后父也先世建昌人高祖政以軍功世襲百戶調通州右衛遂家焉景行故將門獨嗜學弱冠試諸生高等穆宗居裕邸選其女為妃授景行錦衣千戶隆慶元年封固安伯景行素恭敬每遇遣祀

冊封諸典禮必齊戒將事家居誠諸子以退讓萬厯中
卒太后帝及中宮潞王公主賻贈優厚人皆榮之子昌
言嘉言善言名言皆官錦衣昌言先景行卒其子承恩
引李文全例請襲祖封帝曰承恩孫文全子也不可比
以都督同知授之

李偉字世奇灤縣人神宗生母李太后父也兒時嬉里
中有羽士過之驚語人曰此兒骨相當位極人臣嘉靖
中偉夢空中五色彩輦旌幢鼓吹導之下寢所已而生

太后避警攜家入京師居久之太后入裕邸生神宗隆慶改元立皇太子授偉都督同知神宗立封武清伯再進武清侯太后能約束其家偉嘗有過太后召入宮切責之不以父故亂祖宗法以是偉益小心畏慎有賢聲萬曆十一年卒贈安國公謚莊簡子文全嗣侯卒子銘誠嗣天啟末銘誠頌魏忠賢功德建祠名鴻勛莊烈帝定逆案銘誠幸獲免久之大學士薛國觀請勒勛戚助軍餉時銘誠已卒子國瑞當嗣爵其庶兄國臣與爭產

言父遺貲四十萬願輸以佐軍興帝初不允至是詔借
餉如國臣言國瑞不能應帝怒奪國瑞爵遂悸死有司
復繫其家人國瑞女字嘉定伯周奎孫奎請於莊烈后
后曰但迎女秋毫無所取可也諸戚畹人人自危會皇
五子疾亟李太后憑而言帝懼悉還李氏產復武清爵
而皇五子竟殤或云中人構乳媪教皇五子言之也未
幾國觀遂以事誅

王偉餘姚人神宗顯皇后父也萬曆五年授都督尋封

永年伯帝欲加恩偉子棟及其弟俊閣臣請俱授錦衣
正千戶帝曰正德時皇親夏助等俱授錦衣指揮使世
襲今何薄也大學士張居正等言正德時例世宗悉已
釐革請授棟錦衣衛指揮僉事俊千戶如前議帝意未
憚居正固奏乃止偉卒傳子棟及曾孫明輔襲伯如制
鄭成憲大興人神宗鄭貴妃父也貴妃有寵鄭氏族並
驕恣帝悉不問成憲累官至都督同知卒子國泰請襲
帝命授都指揮使給事中張希泉言指揮使下都督一

等不宜授任子妃家蒙恩如是何以優后家不報是時
廷臣疑貴妃謀奪嫡羣以為言國秦不自安上疏請立
太子其從子承恩亦言儲位不宜久虛大學士沈一貫
左右於帝弗聽詔奪國秦俸而斥承恩為民然言者終
不息萬曆二十六年承恩復上疏劾給事中戴士衡知
縣樊玉衡妄造憂危竝議離間骨肉污鱗皇貴妃帝怒
憂危竝議者不知誰所作中言侍郎呂坤構通宮掖將
與國秦等擁戴福王而士衡前嘗論坤與承恩相結玉

衡方抗言貴妃沮立太子疏並留中故承恩指兩人帝怒士衡玉衡皆承成廷臣益忿鄭氏久之皇太子立四十三年男子張差持梃入東宮被禽言者皆言國泰謀刺皇太子主事王之寀鞠差差指貴妃宮監郎中陸大受給事中何士晉遂直攻國泰帝以貴妃故不欲竟事詳之寀等傳國泰官左都督病死于養性襲職天啓初光祿少卿高攀龍御史陳必謙追論其罪且言養性結白蓮賊將為亂詔勒養性出京師隨便居住魏忠賢用

事宥還

王昇熹宗生母孝和太后弟也父鉞天啟元年封昇新城伯尋以皇子生進侯卒子國興嗣崇禎十七年京師陷自焚死

劉文炳字淇筠宛平人祖應元娶徐氏生女入宮即莊烈帝生母孝純皇太后也應元早卒帝即位封太后弟敘祖新樂伯即文炳父也崇禎八年卒文炳嗣是年文炳大母徐年七十賜寶鈔白金文綺帝謂內侍曰太夫

人年老猶聰明善飯使太后在不知若何稱壽也因愴然泣下九年進文炳為新樂侯其祖父世贈爵如之十三年宮中奉太后像或曰未肖帝不懌遣司禮監太監王裕民同武英殿中書至文炳第敕徐口授繪像以進左右咸驚曰肖帝大喜命卜日具鹵簿帝俯伏歸極門迎入安奉奉慈殿朝夕上食如生因追贈應元瀛國公封徐氏瀛國太夫人文炳晉少傅叔繼祖弟文耀文照俱晉爵有差文炳母杜氏賢每謂文炳等曰吾家無功

德直以太后故受此大恩當盡忠報天子帝遣文炳視
鳳陽祖陵密諭有大事上聞文炳歸奏史可法張國維
忠正有方畧宜久任必能滅賊後兩人果殉國難文炳
謹厚不妄交獨與宛平太學生申湛然布衣黃尼麓及
駙馬都尉輩永固善時天下多故流賊勢益張文炳與
尼麓等講明忠義為守禦計及李自成據三秦破榆林
將犯京師文炳知勢不支慷慨泣下謂永固曰國事至
此我與公受國恩當以死報十七年正月帝召文炳永

固等問國事二人請早建藩封遣永定二王之國帝是
之以內帑乏不果行三月初一日賊警益急命文武勳
戚分守京城繼祖守皇城東安門文耀守永定門永固
守崇文門文炳以繼祖文耀皆守城故未有職事十六
日賊攻西直門勢益急尼麓踉蹌至謂文炳曰城將陷
君宜自為計文炳母杜氏聞之即命侍婢簡筭縗於樓
上作七八纒命家僮積薪樓下隨遣老僕鄭平迎李氏
吳氏二女歸曰吾母女同死此又念瀛國太夫人年篤

老不可俱燼因與文炳計匿之申湛然家十八日帝遣
內使密召文炳永固文炳歸白母曰有詔召兒兒不能
事母母拊文炳背曰太夫人既得所我與若妻妹死耳
復何憾文炳偕永固謁帝時外城已陷帝曰二卿所糾
家丁能巷戰否文炳以衆寡不敵對帝愕然永固奏曰
臣等已積薪第中當闔門焚死以報皇上帝曰朕志決
矣朕不能守社稷朕能死社稷兩人皆涕泣誓效死出
馳至崇文門須臾賊大至永固射賊文炳助之殺數十

人各馳歸第十九日文照方侍母飯家人急入曰城陷矣文照盥脫地直視母母遽起登樓文照及二女從之文炳妻王氏亦登樓懸孝純皇太后像母率衆哭拜各縊死文照入環墮拊母背連呼曰兒不能死矣從母命留侍太夫人遂逃去家人共焚樓文炳歸火烈不得入入後園適湛然尼麓至曰鞏都尉已焚府第自刎矣文炳曰諾將投井忽止曰戎服也不可見皇帝湛然脫已憤冠之遂投井死繼祖歸亦投井死繼祖妻左氏見大

宅火亟登樓自焚妾董氏李氏亦焚死初文耀見外城
破突出至渾河聞內城破復入見第焚大哭曰文耀未
死以君與母在今至此何生為遂覓文炳死所大書版
井旁曰左都督劉文耀同兄文炳畢命報國處亦投井
死闔門死者四十二人是時惠安伯張慶臻集妻子同
焚死新城侯王國興亦焚死宣城伯衛時春懷鐵券闔
門赴井死與永固射賊楊光陞者駙馬都尉子也被甲
馳突左右射與永固相失矢盡投觀象臺下井中死而

湛然以匿瀛國為賊所拷掠終不言體康爛以死福王時諡文炳忠壯文炳忠果

張國紀祥符人熹宗張皇后父也天啟初封太康伯魏忠賢與客氏忌皇后因謀陷國紀使其黨劉志選梁夢環先後劾國紀謀占宮婢韋氏矯中宮旨驚獄忠賢將從中究其事以撼后大學士李國楨曰君后猶父母也安有勸父構母者國紀始放歸故郡忠賢猶欲持之莊烈帝立乃得免崇禎未以輸餉進爵為侯旋死於賊

周奎蘓州人莊烈帝周皇后父也崇禎三年封嘉定伯
賜第於蘇州之葑門帝嘗諭奎及田貴妃父弘遇袁貴
妃父祐宜恪遵法度為諸戚臣先祐頗謹慎惟弘遇驕
縱奎居外戚中碌碌而已李自成逼京師帝遣內侍徐
高密諭奎倡勦戚輸餉奎堅謝無有高憤泣曰后父如
此國事去矣奎不得已奏捐萬金且乞皇后為助及自
成陷京師掠其家得金數萬計人以是笑奎之愚云

明史卷三百

欽定四庫全書

明史卷三百考證

張麒

臣

章宗瀛按張麒明實錄獻徵錄俱作麒后妃列傳及外戚世表亦同原刻目錄謹作麒謹据改

陳公傳

臣

章宗瀛按明置錄洪武三年三月立揚王

墓碑詔內臣禮官往祭而修治之且實守塋戶四年正月詔工部改建皇外祖考揚王廟於泗州盱眙縣之墓所是立碑立廟乃兩年事傳載未晰謹附考

從大將張世傑扈駐南海 舊本扈駐南海作扈從祥

興臣章宗瀛按宋漁原碑文云當宋之季名隸尺籍

伍符中從大將張世傑扈祥興帝駐南海考祥興即

宋末衛王昺也王昺僻處海隅固不得承大統但徒

稱祥興年號殊於史傳文體未協且節去駐南海三

字則下文溺死及達岸等語皆無根謹據原碑文另

節改

四年命禮部尚書陶凱即宿州瑩次立廟帝自為文以

祭 臣章宗瀛按明實錄洪武四年正月詔工部改建皇外舅徐王廟於宿州之墓所及按獻徵錄洪武四年六月詔禮部尚書陶凱謨徐王廟碑此傳未晰
謹附考

張麒傳洪武十六年以女為燕世子妃 舊本十六訛
二十 臣章宗瀛按燕世子即成祖太子仁宗也考仁宗本紀於洪武二十八年冊為燕世子永樂二年冊為皇太子此於洪武十六年即書燕世子者後人作

史之詞也又考張皇后列傳於洪武十六年封燕世
子妃永樂二年封皇太子妃此傳作洪武二十年以
女為燕世子妃誤謹據改

永樂九年追封彭城伯謚恭靖後進侯 舊本永樂九
年作仁宗即位臣章宗瀛按獻徵錄麒於永樂辛卯

追封彭城伯甲辰進彭城侯考辛卯係永樂九年甲
辰乃永樂二十二年也又按外戚世表麒於永樂九
年六月追封伯仁宗即位十一月追贈侯實錄亦同

蓋仁宗即位雖在永樂甲辰之秋而麒之封伯實已
在前特進侯在仁宗時耳傳中叙封伯進侯兩事俱
在仁宗即位下誤謹据改

杲嘗有過成祖戒之

臣

章宗瀛按杲有弟旭居鄉驕

橫成祖不欲顯斥之故因杲致戒焉見識大錄謹附
識

子軫早亡

臣

章宗瀛按昇子軫襄府典寶見獻徵錄

謹附識

正德元年令參英國公張懋保國公朱暉提督團營

臣章宗瀛按世表偉於弘治十二年鎮陝西召還十

三年八月領左府表偉正德三年十二月提督團營并三千營管操考實錄亦同此傳云元年令參提督團營或元年止分領其事三年則專任之耳謹附攷

從子元善嗣 舊本無從字 臣章宗瀛按世表元善乃

鏞從子傳脫從字謹據增並於後三行節去一入字以數勻刻

孫忠

臣

章宗瀛按獻徵錄忠以生員貢太學洪武已

卯出為山西介休主簿有治聲尋以外艱去服除補

河南永城主簿傳載未悉謹附識

三年皇后胡氏廢貴妃為皇后封忠會昌伯臣章宗瀛

按實錄宣德四年三月封忠會昌伯子孫世襲外戚

世表亦同蓋孫后以三年立忠以四年封耳傳載未

晰謹附攷

子璉授錦衣衛指揮使

臣

章宗瀛按璉字國用淳謹

不與諸貴遊相將母卒哀毀得疾不起年三十六卒
見獻徵祿謹附識

吳安

臣

章宗瀛按吳安賢妃弟也成化十八年正月

卒見實錄謹附識

天順改元擢都指揮使成化時累擢都督同知

臣章

宗瀛按雄於天順元年陞都指揮使成化初晉後軍

都督僉事尋轉同知府事舊本作天順改元累擢都

督同知誤謹据增

雄卒子承宗亦屢官錦衣衛都指揮使弘治二年承宗
祖母王氏援憲宗外家王氏例請封乃封承宗安昌
伯世襲臣章宗瀛按實錄成化十五年正月雄卒
後上念累朝外戚俱有封爵乃封承宗為安昌伯又
弘治二年四月子承宗子孫世襲外戚世表亦同蓋
封伯與世襲係兩事且中間相距已十一年也傳載
未晰謹附考

嘉靖五年承宗卒

臣章宗瀛按實錄嘉靖五年正月

唐成安昌伯錢承宗卒原刻誤作嘉靖四年謹据改

承宗妻

臣

章宗瀛按實錄承宗妻請以庶長男維垣

嗣此傳誤作承宗母謹据改

乃降昱為副千戶尋卒敏削職還里 舊本無抗昱句

臣章宗瀛按實錄天順元年二月降錦衣衛指揮使

杭昱為副千戶傳云昱已前卒誤謹据改

外戚競營私利

臣

章宗瀛按競營私利原刻作經營

私利玩下文聚眾相關意競字較合謹据文義改

悉擢或子瑋等六人為錦衣官

臣章宗瀛按正德二

年閏正月復太保長寧伯周或之子瑋瑋錦衣衛世襲指揮使琪璘瑋世襲正千戶職瑋特授錦衣百戶從或乞也見實錄謹識

王鎮字克安上元人

臣章宗瀛按王氏先世容雲人

鎮父鳳始遷籍於上元見獻徵錄謹識

弘治五年進侯

臣章宗瀛按獻徵錄弘治元年戊申

推恩舅氏益祿百石越五年壬子進封侯爵子孫世

襲追封其父阜國公母阜國太夫人十六年癸亥加
太保原刻作五年進侯誤蓋元年戊申下距壬子正
五年也且本傳前云源父鎮於弘治五年追封阜國
公考源之進侯與鎮之贈公皆一時事傳中不應前
後互異謹據改

萬貴諸城人 舊本無諸城人三字 臣章宗瀛按萬

貴妃列傳云諸城人此傳亦宜增入謹節去本行一
字次行兩字以符勻刻攷前後各傳體例於書名下

即書地此卷多有遺漏者今畫一增並於初見處
聲明謹識

邵喜傳七年大學士張璉等言 舊本無七年二字

八年給事中陸粲論大學士桂萼受杰賂 舊本

八年二字作會字 臣章宗瀛按世表蕙以嘉靖

六年十二月卒杰以七年二月襲又按世宗本紀

七年六月明倫大典成頒示天下八年因陸粲劾

罷桂萼相此傳叙杰之嗣伯不書年月而明倫大典

成及陸粲論桂萼事皆以明年統之所載未晰謹据
改

帝怒罷萼相而盡革外戚封舊本罷萼相作下粲獄

目章宗瀛按桂萼傳給事中陸粲極論其罪帝大

悟奪萼官以尚書致仕又按陸粲傳云粲疏論萼納
賄擅權諸罪狀帝立下詔暴萼罪罷其相而以粲不
早發下之吏部杰亦罷襲此傳云帝怒自因萼之受
賄使奴隸冒封爵故耳詳其情事固宜以萼為重原

本下架獄不如罷萼相較妥謹据改

張巒興濟人

臣

章宗瀛按張皇后列傳云興濟人此

傳遺漏謹据增

弘治三年封壽寧伯五年進侯 舊刻三年作四年

臣

章宗瀛按獻徵錄成化中皇后為東宮妃授巒鴻臚

寺卿弘治三年陞都督府同知是年冬封壽寧伯五

年東宮立巒得進侯又按實錄巒於弘治三年封伯

四年子世襲五年進侯此傳作四年封伯誤謹据改

夏儒傳上元人

臣

章宗瀛按獻徵錄夏儒字宗魯其

先上元人永樂間北徙大興縣因家焉又按夏

皇后列傳云上元人此傳遺漏謹据增

子臣嗣伯

臣

章宗瀛按實錄正德元年立后以夏儒

為錦衣衛指揮使尋進為中軍都督府都督同知正

德二年儒封伯陞皇親夏助為錦衣衛指揮使夏臣

指揮同知又按獻徵錄儒子三人長助次臣次勳也

傳載未詳謹附識

陳萬言傳元城人

臣

章宗瀛按后妃列傳陳皇后元

城人攷地理志元城縣屬大名府此傳作大名人未

晰謹據改

方銳傳江寧人

臣

章宗瀛按后妃列傳方皇后江寧

人考地理志江寧縣屬應天府此傳作應天人未晰

謹據改

陳景行傳先世建昌人高祖調通州遂家焉

臣

章宗

瀛按獻徵錄景行字希哲系出建昌高祖徙浙之青

田後調河南安吉衛又調通州右衛傳載未悉謹附

識

子昌言嘉言善言名言皆官錦衣昌言先景行卒其子

承恩

臣

章宗瀛按昌言錦衣衛都指揮僉事嘉言

錦衣衛指揮使善言名言俱錦衣衛千戶承恩錦衣

衛勲衛見獻徵錄謹附攷

王偉餘姚人

臣

章宗瀛按王右列傳云餘姚人此

傳遺漏謹据增

鄭成憲大興人

臣

章宗瀛按鄭貴妃列傳云大興人

此傳遺漏謹据增

郎中陸大受

舊本郎中作主事

臣

章宗瀛按陸大受

本傳云萬曆二十五年進士授行人屢遷戶部郎中

又按實錄云戶部署郎中事陸大受上疏明紀事本

末亦書戶部郎中陸大受此傳作主事陸大受誤謹

據改

王昇熹宗生母孝和太后弟也

臣

章宗瀛按王太后

列傳云順天人未詳順天何處攷畿輔通志云王國興字熙平霸州人此傳不書謹附識

京師陷自焚死 舊刻自焚死作被殺 臣章宗瀛按後

劉炳文傳末稱王國興焚死畿輔通志亦云率妻子自焚死此傳云被殺誤謹据改


又念瀛國太夫人年薦老不可俱燼因與文炳計匿之
申湛然家 臣章宗瀛按明紀事本末瀛國太夫人亦投井死與此所紀互異謹識

新城侯王國興亦焚死

臣

章宗瀛按王國興刻本誤

作王國典謹据前王昇傳及外戚世表改



明史卷三百考證

附明史卷三百考證後

順治九年

賜謚諸臣

張慶臻 專謚忠毅 劉文炳 專謚忠恪

鞏永固 專謚忠烈 衛時春 專謚忠穆

乾隆四十一年

賜謚諸臣

王國興 通謚忠節 劉文耀 通謚烈愍

劉繼祖 通謚節愍

賜祀忠義祠

楊光陸 申湛然

欽定四庫全書

史部
明史卷三百二

郎中臣丁雲錦覆勘

總校官編修臣朱鈐

欽定四庫全書

明史卷三百一

大學士張廷玉等奉 敕修

列傳第一百八十九

列女

婦人之行不出於閨門故詩載閨雝葛覃桃夭芣苢皆
處常履順貞靜和平而內行之修王化之行具可考見
其變者行露柏舟一二見而已劉向傳列女取行事可

為鑒戒不存一操范氏宗之亦采才行高秀者非獨貴
節烈也魏隋而降史家乃多取患難顛沛殺身殉義之
事蓋輓近之情忽庸行而尚奇激國制所褒志乘所錄
與夫里巷所稱道流俗所震駭胥以至奇至苦為難能
而文人墨客往往借倣儻非常之行以發其偉麗激越
跌宕可喜之思故其傳尤遠而其事尤著然至性所存
倫常所係正氣之不至於淪澌而斯人之所以異於禽
獸載筆者宜莫之敢忽也明興著為規條巡方督學歲

上其事大者賜祠祀次亦樹坊表烏頭綽楔照耀井閭
乃至僻壤下戶之女亦能以貞白自砥其著於實錄及
郡邑志者不下萬餘人雖間有以文藝顯要之節烈為
多嗚呼何其盛也豈非聲教所被廉恥之分明故名節
重而蹈義勇歟今掇其尤者或以年次或以類從具著
於篇視前史殆將倍之然而姓名湮滅者尚不可勝計
存其什一亦足以示勸云

月娥

劉孝婦

甄氏

諸娥

丁氏 石氏

楊氏

張氏等

貞女韓氏

黃善聰

姚孝女

蔡孝女
招遠孝女

盧佳娘

施氏

吳氏

畢氏

石孝女

湯慧信

義婢妙聰

徐孝女

高氏 女

孫義婦

梁氏

馬氏

義姑萬氏

陳氏

郭氏 幼溪女

程氏

王妙鳳 唐貴梅
張氏

楊泰奴 張氏

陳氏 秀水張氏
歐陽金貞

莊氏 唐氏

王氏 易氏

陶氏四節婦

宣氏 孫氏

徐氏

義妾張氏

龔烈婦 江氏

范氏二女 丁美音

成氏 興安二女子

章銀兒 茅氏

招囊猛

凌氏 杜氏

義婦楊氏

史氏 林端娘

汪烈婦

竇妙善

石門丐婦

賈氏

胡氏

陳宗球妻史氏

葉氏

胡貴貞

孫氏

江氏 嚴氏

月娥西域人元武昌尹扎瑪魯廸音女少聰慧聽諸兄

誦說經史輒通大義長適蕪湖葛通甫事上撫下一秉
禮法長似盧率諸婦女悉受其教太祖渡江之七年偽
漢兵自上游而下盧曰太平有城郭且嚴兵守可恃使
月娥挾諸婦女往避之未幾寇至城陷月娥歎曰吾生
詩禮家可失節於賊邪抱幼女赴水死諸婦女相從投
水者九人方盛暑屍七日不浮顏色如生鄉人為巨穴
合葬之故居之南題曰十女墓娥弟丁鶴年幼通經史
皆娥口授也後通甫與盧皆死於寇

劉孝婦新樂韓太初妻太初元時為知印洪武初例徙和州挈家行劉事姑謹姑道病刺血和藥以進抵和州夫卒劉種蔬給姑食越二年姑患風疾不能起晝夜奉湯藥驅蚊蠅不離側姑體腐蛆生席間為齧蛆蛆不復生及姑疾篤剖肉食之少甦踰月而卒殯之舍側欲還葬舅塚力不能舉喪哀號五載太祖聞之遣中使賜衣一襲鈔二十錠命有司還其喪旌門閭復徭役同時甄氏樂城李大林妻事姑孝姑壽九十一卒甄廬墓三年

暮悲號亦被旌

諸娥浙江山陰人父士吉洪武初為糧長有黠而逋賦者誣士吉於官論死二子炳煥亦罹罪娥方八歲晝夜號哭與舅陶山長走京師訴寃時有令寃者非卧釘板勿與勘問娥輾轉其上幾斃事乃聞勘之僅成一兄而止娥重傷卒里人哀之肖像配曹娥廟

丁氏錦孥唐方妻浙江新昌人洪武中方為山東僉事坐法死妻子當沒為官婢有司按籍取之監護者見丁

色美借梳掠髮丁以梳擲地其人取掠之持還丁丁罵不受謂家人曰此輩無禮必辱我非死無以全節肩輿過陰澤崖峭水深躍出赴水衣厚不能沉從容以手斂裙隨流而沒年二十八時稱其處為夫人潭鄭堪妻石氏堪浦江鄭泳孫也洪武初李文忠薦諸朝屢遷藏庫提點坐法死石當遣配泣曰我義門婦也可辱身以辱門乎不食死

楊氏慈谿人字同邑鄭子珠洪武中子珠父仲徽戍雲

南明制子成丁者隨遣子珠亦在戍中楊年甫十六聞子珠母老弟幼請於父母適鄭養姑以待子珠之返子珠竟卒戍所楊與姑撫諸叔成立以夫從子孔武為嗣苦節五十餘年其後鄭煥妻張氏嫁未旬日泰然妻嚴氏生子一蘭方孩抱棧妻王氏事夫癘病狂不省人事服勤八年弗怠三人皆楊氏夫族先後早寡皆以節聞萬厯中知府鄒希賢題曰鄭氏節門以比浦江鄭氏義門云

貞女韓氏閩中人元末明玉珍據蜀貞女慮見掠偽為
男子服混迹民間既而被驅入伍轉戰七年人莫知其
處女也後從玉珍破雲南還遇其叔父贖歸成都始改
裝而行同時從軍者莫不驚異洪武四年嫁為尹氏婦
成都人以韓貞女稱其後有黃善聰者南京人年十三
失母父販香廬鳳間令善聰為男子裝從遊數年父死
善聰習其業變姓名曰張勝有李英者亦販香與為伴
侶者踰年不知其為女也後偕返南京省其姊姊初不

之識詰知其故怒詈曰男女亂羣辱我甚矣拒不納善
聰以死自誓乃呼鄰嫗察之果處子也相持痛哭立為
改裝明日英來知為女怏怏如失歸告母求婚善聰不
從曰若歸英如瓜李何鄰里交勸執益堅有司聞之助
以聘判為夫婦

姚孝女餘姚人適吳氏父早世迎母養於家虎銜之去
女追掣虎尾虎欲前女掣益力尾遂脫虎負痛躍去負
母還藥之獲愈奉其母二十年後成化間武康有蔡孝

女隨母入山採藥虎攫其母女折樹枝格鬪三百餘步
虎舍其母傷女血歃丈許竹葉為赤女亦獲全後招遠
有孝女不知其姓父採石南山為蟒所吞女哭之願見
父屍同死俄頃大雷電擊蟒墮女前腹裂見父屍女負
土掩埋觸石而死

盧佳娘福清李廣妻婚甫十月廣暴卒盧慟絕復甦見
廣口鼻出惡血悉飮食之既殮哭輒僵仆積五六日家
人防懈潛入寢室自經後其縣有游政妻倪氏殉夫亦

然又有施氏濠州彭禾妻正德元年禾得疾不起握手
訣曰疾憊甚知必死汝無子擇壻而嫁毋守死徒自苦
也施泣曰君尚不知妾乎願先君死禾固止之因取禾
所嘔血盡吞之以見志及禾歿即自經

吳氏潞州廩生盧清妻舅姑歿於臨沼寄瘞旅次清授
徒自給後失廩充掾於汴憤恥發狂死吳聞訃痛絕哭
曰吾舅姑委骨於北良人死忍令終不返乎乃寄幼孤
於姊兄鬻次女為資獨抵臨沼覓舅姑瘞處不得號哭

中野忽一丈夫至則清所授徒也為指示收二骸以歸
復冒暑之汴負夫骨還三喪畢舉忍餓無他志學正劉
崧言於知州馬暉贖其女厚恤之年七十五乃卒後有
畢氏河閒鄧節妻年饑攜家景州就食舅姑相繼亡節
亦尋歿俱藁葬景州氏年三十三無子女獨歸里中忍
饑凍晝夜紡織積數年市地城北八里莊獨之景州負
舅姑及夫骨還葬

石孝女浙江新昌人襁褓時父潛坐事籍沒繫京獄母吳

以漏籍獲免依兄弟為生一日父脫歸匿吳家吳兄弟懼
連坐殺置大窖中母不敢言女長問母曰我何無父
族母告之故女大悲憤永樂初年十六舅氏主婚
配族子女白母曰殺我父者吳也奈何為父讐婦母曰
事非我主奈何女領而不答嫁之曰方禮賓女自經室
中母仰天哭曰吾女之死不欲為讐人婦也號慟數日
亦死有司聞之治殺潛者罪

湯慧信上海人通孝經列女傳嫁華亭鄧林林卒婦年

二十五一女七歲鄧族利其居迫使歸家婦曰我鄧家婦何歸乎族知不可奪質其居於巨室婦泣曰我收夫骨於茲土與同存亡奈何棄之欲自盡巨室義而去之婦尋自計曰族利我財耳乃出家資盡畀族人躬績絀以給歲大水居荒野沮洳中其女適人者操舟來迎不許請暫憇舟中亦不許曰我守此六十年因巨浸以從汝父所甘心焉復何往母女方相牽未捨水至湯竟溺死

義婢妙聰保安右衛指揮張孟喆家婢也永樂中調兵
操宣府孟喆在行北寇入掠妻李謂夫妹曰我命婦與
若皆官門女義不可辱相挈投井中妙聰亦隨入見二
人俱未死以李有娠恐水冷有所害遂負之於背賊退
孟喆弟仲喆求三人井中以索引嫂妹出而婢則死矣
徐孝女嘉善徐遠女也年六歲母患賺瘡女問母何以
得愈母謾曰兒吮之迺愈女遂請吮母難之女悲啼不
已母不得已聽之吮數日果愈

高氏女武邑人適諸生陳和和早卒高獨持門戶奉翁姑甚孝及宣德時翁姑並歿氏以禮殯葬時年五十矣泣謂子剛曰我父洪武間舉家客河南虞城父死旅葬城北母以棗木小車輶識之比還家母亦死弟懦不能自振吾三十年不敢言者以汝王母在堂當朝夕侍養也今大事已畢欲舁吾父遺骸歸合葬剛唯唯隨母至虞城抵葬所塚累累不能辨氏以髮繫馬鞍逆行自朝及夕至一小塚鞍重不能前即開其塚所識車輶宛然

遠近觀者咸驚異助之歸啟母窆同葬

孫義婦慈谿人歸定海黃誼昭生子湑未幾夫卒孫育之成立求兄女為配甫三年生二子湑亦卒時田賦皆令民自輸孫姑婦相率攜幼子輸賦南京訴尚書蹇義言縣苦潮患十年九荒乞築海塘障之義見其孤苦詰曰何為不嫁對曰餓死事極小失節事極大義嗟歎久之次日即為奏請遣官偕有司相度成之起自龍山迄於觀海永免潮患慈谿人廟祀之塘上

梁氏大城尹之路妻嫁歲餘夫乏食出遊山海關賣熟食為生又娶馬氏生子二十餘卒不通問氏事翁姑艱苦無怨言夫客死氏徒步行乞迎夫喪往返二千里迄扶柩攜後妻二子以歸里人歎異

馬氏徐佈妻吳縣人歸五年夫死無子家酷貧姑欲奪其志有田二畝半得粟不以與婦馬不為動姑潛納他人聘一夕鼓吹臨門趨治妝馬入臥室自經死儿上食器糠粃尚存

義姑萬氏名義顓字祖心鄞人寧波衛指揮僉事鍾女也幼貞靜善讀書兩兄文武皆襲世職戰死旁無期功之親繼母曹氏兩嫂陳氏吳氏皆盛年孀居吳遺腹僅六月姑旦暮拜天哭告曰萬氏絕矣願天賜一男續忠臣後我夫不嫁共撫之已果生男名之曰全姑喜曰萬氏有後矣乃與諸嫠共守名閨來聘皆謝絕之訓全讀書迄底成立全嗣職傳子禧孫椿皆奉姑訓惟謹姑年七十餘卒姑之祖斌及父兄並死王事母及二嫂守貞

數十年姑更以義著鄉人重之稱為四忠三節一義之門後有陳義姑者沙縣陳穗女年十八父母相繼卒遺二男長七歲次五歲親族利其有日眈眈於旁姑矢志撫弟居常置帚數十族兄弟暮夜叩門姑燃帚照之極啟戶具酒食款叩者告曰吾輩夜行滅火就求燭耳自此窺伺者絕意及二弟畢婚年四十五乃嫁終無子二弟迎歸母事之

郭氏大田人鄧茂七之亂鄉人結寨東巖寨破郭祿幼

兒走且有身為賊所驅郭奮罵投百尺巖下與兒俱碎
亂石閒胎及腸胃迸出狼籍巖下賊據高瞰之皆歎曰
真烈婦也瘞之去同時有幼溪女失其姓名茂七破沙
縣匿草間為二賊所獲遇溪橋貞女曰扶我過當從一
人而終二賊爭趨挽至橋半女視溪流湍急拽二賊投
水中俱溺死

程氏揚州胡尚絅妻尚絅嬰危疾婦剖腕肉噉之不能
咽而卒婦號慟不食二日懷孕四月矣或曰得男可延

夫嗣徒死何為答曰吾亦知之倘生女徒苟活數月耳
因復食彌月果生男明年殤即前語翁姑曰媳不能常
侍奉有娣姒在無悲也復絕食越二日其姑撫之曰爾
父母家二百里內若不俟面訣乎婦曰可急迎之日飲
米瀋一匙以待逾十有二日父母遣幼弟至婦曰是可
白吾志自是滴水不入口徐簡奩中簪珥令辦後事以
其餘散家人并鄰嫗嘗通問者復自卜曰十八九日皆
良吾當逝向曾封肉救夫夫不可救以灰和之置牀頭

附吾左腕以示全歸遂卒

王妙鳳吳縣人適吳奎姑有淫行正統中奎商於外姑與所私飲并欲汚之命妙鳳取酒挈瓶不進頻促之不得已而入姑所私戲紛其臂妙鳳憤拔刀斫臂不殊再斫乃絕父母欲訟之官妙鳳曰死則死耳豈有婦訟姑理邪逾旬卒唐貴梅者貴池人適同里朱姓姑與富商私見貴梅悅之以金帛賄其姑誨婦淫者百端勿聽加箠楚勿聽繼以炮烙終不聽乃以不孝訟於官通判某

受商賂拷之幾死者數矣商冀其改節復令姑保出之
親黨勸婦首實婦曰若爾妾之名幸全如播姑之惡何
夜易服自經後園梅樹下及旦姑起且將撻之至園中
乃知其死尸懸樹三日顏如生其後嘉靖二十三年有
嘉定張氏者嫁汪客之子其姑多與人私諸惡少中有
胡巖者最桀黠羣黨皆聽其指使於是與姑謀遣其子
入縣為卒而巖等日夕縱飲一日呼婦共坐不應巖從
後攫其梳婦折梳擲地頃之巖徑入犯婦婦大呼殺人

以杵擊巖巖怒走出婦自投於地哭終夜不絕氣息僅屬詰旦巖與姑恐事洩繫諸牀足守之明日召諸惡少酣飲二鼓共縛婦槌斧交下婦痛苦宛轉曰何不以利刃刺我一人乃前刺其頸一人刺其脇又極其陰舉尸欲焚之尸重不可舉乃火其室鄰里救火者蹋門入見嚇然死人驚聞於官官逮小女奴及諸惡少鞫之具得其實皆以次受刑婦死時年十九邑故有烈婦祠婦死前三日祠旁人聞空中鼓樂聲火炎炎從祠柱中出人

以為貞婦死事之徵云

楊泰奴仁和楊得安女許嫁未行天順四年母疫病不愈泰奴三割曾肉食母不效一日薄暮剖曾取肝一片昏仆良久及甦以衣裹創手和粥以進母遂愈母宿有膝攣疾亦愈後有張氏儀真周祥妻姑病醫百方不效一方士至其門曰人肝可療張割左脇下得膜如絮以手探之沒腕取肝二寸許無少痛作羹以進姑病遂瘳陳氏祥符人字楊瑄未嫁而瑄卒女請死父母不許欲

往哭又不許私剪髮屬媒氏置瑄懷汴俗聘女以金書
生年月日畀男家號定婚帖瑄母乃以帖裹其髮置瑄
懷以葬女遂素服以居亡何父母謀改聘女縊死後五
十三年至正德中瑄姪永康改葬瑄求陳骨合焉二骨
朽矣髮及定婚帖鮮完如故葬三年岐穀了瓜產墓上
張氏秀水人年十四受同邑諸生劉伯春聘伯春負才
名必欲舉於鄉而後娶未幾卒女號泣絕髮自為詩祭
之持服三年不踰閭不如葷服闋即絕飲食父母強諭

之終不食旬日而卒年二十舅姑迎柩合葬焉又有江
夏歐陽金貞者父梧授孝經列女傳稍長字羅欽仰從
梧之官柘城梧艱歸舟次儀真欽仰墜水死金貞年甫
十四驚哭欲赴水從之父母持不許又欲自縊父母曰
汝未嫁何得爾對曰女自分無活理即如父母言願終
身稱未亡人大聲哀號不止及殮剪髮繫夫右臂以殉
抵家告父母曰有婦以事姑也姑既失子可并令無婦
乎願歸羅以畢所事父母從之後父知廣元縣姑病卒

女乃歸寧有諷他適者曰事姑畢矣更何待女曰我昔
殮羅郎時有一束髮纏其手誰能掘塚開棺取髮還我
則易志矣遂止生平獨卧一樓年六十餘卒

莊氏海康吳金童妻成化初廣西流寇掠鄉邑莊隨夫
避新會傭劉銘家銘見莊美欲犯之屢誘不從乃令黨
梁狗同金童入海捕魚沒水死越三日不還莊求之海
濱屍浮岬側手足被縛腫腐莫可辨莊以衣識之歸攜
女赴水抱夫屍而沒翼日三屍隨流遶銘門去而復還

土人感異殯祭之然莫知銘殺也後梁狗漏言有司並
捕考處以極刑唐氏汝陽陳旺妻隨其夫以歌舞逐食
四方正德三年秋旺攜妻及女環兒姪成兒至江夏九
峰山有史聰者亦以傀儡為業見婦女皆艷麗而旺且
老因給旺至青山夜殺之明日聰獨返攜其婦女幼姪
入武昌山吳王祠持利刃脅唐唐曰汝殺吾夫吾不能
殺汝以復讐忍從汝亂邪遂遇害賊裹以蓆置荆棘中
明日徒蓑衣園賊又迫環兒臨以刃環兒哭且詈聲振

林木賊亦殺之瘞糞壤中而去其年冬至賊被酒成兒
潛出告官禽於葛店市伏誅

王氏慈谿人聘於陳而夫佳病其父母娶婦以慰之及
門即入侍湯藥未幾佳卒婦年甫十七矢志不嫁姑張
氏曰未成禮而守無名婦曰入陳氏門經事君子何謂
無名姑乃邀其二弟從容諷之婦不答截髮毀容姑終
欲強之窘辱萬狀二小姑陵之若婢稍不順即爪其面
姑聞復加箠楚婦口不出怨言曰不逼嫁為婢亦甘也

夜寢處小姑牀下受濕得偃疾私自幸曰我知免矣鞠
從子梅為嗣教之成化初領鄉薦卒昌其家後有易氏
分宜人嫁安福王世昌時世昌已邁疾奄奄十餘月易
事之衣不解帶世昌死除喪猶縞素姑憐之謂汝猶處
子可終累乎跪泣曰是何言哉父母許我王氏即終身
王氏婦矣自是獨處一樓不窺外戶四十餘年方世昌
疾所吐痰血輒手一布囊盛之卒後用所盛囊為枕枕
之終身

鍾氏桐城陶鏞妻鏞以罪被戍卒於外鍾年二十五子
繼甫在抱負鏞骨四千餘里歸葬乃斷髮杜門年八十
二以節終繼亦早卒妻方氏年二十七子亮甫二歲其
兄憐之微叩其意方以死誓景泰中亮舉鄉試業於太
學卒妻王氏年二十八妾吳氏二十二皆無子扶櫬歸
葬貧不能支所親勸之嫁兩人哭曰而不知我之為節
婦婦乎乃共以紡績自給越二十六年縣令陳勉以聞
詔旌三代人稱之曰四節里

宣氏嘉定張樹田妻夫素狂悖與宣不睦夫病宣晨夕奉事及死誓身殉時樹田友人沈思道亦死其婦孫與宣以死相要各分寸帛孫自經或勸宣曰彼與夫相得故以死報汝何為效之宣歎曰予知盡婦道而已安論夫之賢不賢卒縊死

徐氏慈谿人定海金傑妻也成化中傑兄以罪逮入京傑往請代瀕行徐已有身傑謂曰予去生死不可知若生男善撫之金氏鬼庶得食也已而悔曰我幾悞汝吾

去無還理即死善事後人徐泣曰君以義往上必義君
君兄弟當同歸無過苦也即如君言妾有死耳敢忘付
託乎已果生男無何兄得還傑竟瘦死徐撫孤慟曰我
本欲從汝父地下奈金氏何強營葬事服闋父母勸他
適截髮斷指自誓食澹茹苦六十餘年視子孫再世成
立乃卒

義妾張氏南京人松江楊玉山商南京娶為妾逾月以
婦妬遣之歸張屏居自守楊亦數往來所贈千計生

女年餘楊坐役累罄其產怏怏失明張聞之直造楊廬
拜主母捧楊袂大慟乃悉出向所贈金珠具裝嫁其二
女并為二子娶婦留侍湯藥踰年楊死守其柩不去既
免喪父母強之歸不從矢志以歿終身不見一人

龔烈婦江陰人年十七嫁劉玉家貧力作養姑姑亡相
夫營葬夫又亡無以為斂里有羨婦色者欲助以棺龔
覺其意辭之既又強之龔恐無以自脫乃以所生六歲
男三歲女寄食母家是夜積麥豪屋中舉火自焚抱夫

屍死又江氏蒙城王可道妻夫貧負販餬口死不能斂
比鄰諸生李雲蟾合錢斂之卜日以葬及期率衆至其
家閔然無聲厨下燈微明趨視之飲食畢具蓋以待舁
棺者婦已縊死竈旁矣衆驚歎復合錢并葬之

會稽范氏二女幼好讀書並通列女傳長適江一月寡
次將歸傳而夫亡二女同守節築高垣圍田十畝穿井
其中為屋三楹以居當種穫父啟圭竇率傭以入餘日
則塞其竇共汲井灌田如是者三十年自為塋於屋後

成化中卒竟合葬焉族人即其田立祠以祀又有丁美音淑浦丁正明女幼受夏學程聘年十八將嫁學程死美音誓不再嫁父母曰未嫁守節非禮也何自苦如此美音齧指滴血籲天自矢當道交旌之賚以銀幣約百金乃構室獨居鬻田自贍事舅姑養父母鄉人名其田為貞女田

成氏無錫人定陶教諭繒女登封訓導尤輔妻也輔游學靖江成從焉江水夜溢家人倉卒升屋成整衣欲上

問爾等衣邪衆謝不暇成曰安有男女裸而尚可俱生
邪我獨留死耳衆號哭請不應厥明水退生死榻上後
崇禎中興安大水漂沒廬舍有結筏自救者鄰里多附
之二女子附一朽木倏沈倏浮引筏救之年皆十六七
問其姓氏不答二女見筏上男子有裸者歎曰吾姊妹
倚木不死冀有善地可存也今若此何用生為攜手躍
入波中死

章銀兒蘭谿人幼喪父獨與母居邑多火災室盡燬結

茅以棲母母方疾鄰居又火銀兒出視衆呼令疾避銀
兒曰母疾不能動何可獨避亟返入廬欲扶母出烈焰
忽覆其廬衆莫能救火光中遙見銀兒抱其母宛轉同
焚死時弘治元年三月也義妹茅氏慈谿人年十四父
母亡獨與兄嫂居其兄病痿卧值倭入縣嫂出奔呼與
偕行女曰我室女將安之且俱去誰扶吾兄者賊至縱
火女力扶其兄避於空室竟被燔灼並死

招囊猛雲南孟璉長官司土官舍人刁派羅妻也年二

十五夫死守節二十八年弘治六年九月雲南都指揮使奏其事帝曰朕以天下為家方思勵名教以變夷俗其有趨於禮義者烏可不亟加獎勵招囊猛貞節可嘉其即令有司顯其門閭使遠夷益知向化無俟覈報凌氏張維妻慈谿人弘治中維舉於鄉卒婦年二十五子四歲亦卒其兄諷之改圖婦痛哭齧脣啜血灑地終身不歸寧舅姑慰之曰不幸絕嗣日計無賴吾二人景逼矣爾年尚遠何以為活婦曰恥辱事重餓死甘之乃

出簪珥為舅納妾果得子喜曰張氏不絕亡夫墓門且
有寒食矣後舅病瘋姑雙目瞽婦紡績供養二十年不
衰後有杜氏貴池曹桂妻年二十四夫亡遺腹生女悲
苦無計日諷姑為舅納妾果生一子產後妾死杜以已
女託於族母而自乳其叔逾年翁喪勸者曰汝辛苦撫
孤寧能以叔後汝乎杜曰叔後吾翁異日生二子即以
一子後我夫吾志畢矣後卒如其言

義婦楊氏王世昌妻臨漳人弘治中世昌兄坐事論死

世昌念兄為嫡子請代其刑時楊未筭謀於父母宗族
曰彼代兄死為義士我顧不能為義婦邪願訴於上代
夫死遂入京陳情敕法司議夫妻並得釋

史氏杞縣人字弘業未嫁而夫卒欲往殉之母不許
女七日不食母持茗逼之飲雙蛾適墮杯中死女指示
曰物意尚孚我心母獨不諒人邪母知不可奪翌日製
素衣縞裳送之孔氏及暮辭舅姑整衣自經死白氣縷
縷騰屋上達旦始消又有林端娘者甌寧人字陳廷策

聞廷策訃寄聲曰勿殮吾將就死父曰而雖許字未納幣也對曰既許矣何幣之問父謹防之曰女奚所不可死顧死夫家躓耳父曰壻家貧無以周身曰身非所卹又曰壻家貧孰為標名曰名非所求遂往哭奠畢自剋死期理帛自經三拱而絕陳故家青陽山下山下人言婦將盡時山鳴三晝夜

汪烈婦晉江諸生楊希閔妻也年二十三夫死無子欲自經家人防之謹不得聞氏聞茉莉有毒能殺人多方

求之家人不知也日供數百朵踰月家人為亡者齋祭
婦自撰祭文辭甚悲夜五鼓防者稍懈取所積花煎飲
之天明死

竇妙善京師崇文坊人年十五為工部主事餘姚姜榮
妾正德中榮以瑞州通判攝府事華林賊起寇瑞榮出
走賊入城執其妻及婢數人問榮所在時妙善居別室
急取府印開後牕投荷池衣鮮衣前日太守統援兵數
千出東門捕爾等旦夕授首安得執吾婢賊意其夫人

也解前所執數人獨與妙善出城適所驅隸中有盛豹者父子被掠其子叩頭乞縱父賊許之妙善曰是有力當以畀我何得遽縱賊從之行數里妙善視前後無賊低語豹曰我所以留汝者以太守不知印處欲藉汝言之今當令汝歸幸語太守自此前行遇井即畢命矣呼賊曰是人不善畀可仍縱之易善畀者賊又從之行至花塢遇井妙善曰吾渴不可忍可汲水置井傍吾將飲賊如其言妙善至井傍跳身以入賊驚救不得而去豹

入城告榮取印引至花塢覓井果得妙善屍越七年郡
縣上其事詔建特祠賜額貞烈

石門丐婦湖州人莫詳其姓氏正德中湖大飢婦隨其
夫及姑走崇德石門市乞食三人偶相失婦有色市人
爭挑之與之食不顧誘之財亦不顧寓東高橋上不復
乞食者二日伺夫與姑皆不至聚觀者益衆婦乃從橋
上躍入水中死

賈氏慶雲諸生陳俞妻正德六年兵變值舅病卒家人

挽之避痛哭曰舅尚未斂婦何惜一死身服斬衰不解
兵至縱火迫之出罵不絕口刃及身無完膚與舅屍同
燼年二十五

胡氏鄞縣諸生李珂妻年十八歸珂閱七年珂死遺男
女各一胡誓不踰闕鄰火作珂兄珮往救之曰阿姆來
吾乃出現使妻陳往婦以七歲男自牖付之屬曰幸念
吾夫善視之陳曰嬖將何如給之曰取少首飾即出陳
去胡即纍衣箱塞戶抱三歲女端坐火中死

史氏陳宗球妻南安人夫死將殉有期矣尚為姑釀酒
姑曰婦已決死生存豈多日何辛苦為曰政為日短故
釀而奉姑將死告舅曰婦有喪幸毋髹棺遂縊

葉氏定海人許聘慈谿翁姓而父母俱歿遂育於翁年
十四翁資產日落且失其姑舅待之如奴勞勩萬狀畧
無怨色舅以子幼欲鬻之羅姓者葉志曰我非貨也何
輾轉貿易為日哽咽垂涕既知不可免偽為喜色舅遂
寬之夜月上給諸妯曰月色甚佳盍少猶夷乎趨門外

良久諸妣並勸曰夜既半矣盍就寢遂入及晨覓之則氏已浮屍於河矣起之色如生

胡貴貞樂平人生時父母欲不舉其鄰曾媪救之歸與子天福同乳欲俟其長而配焉天福年十八父母繼亡家甚落貴貞父將奪以姻富家女曰我鞠於曾婦於曾分姑媳恩母子可以飢寒棄之邪乃依從姑以居葦舍單淺外人未嘗識其面其兄秉天福未婚曳以歸出使求聘者金寶笄飾女知不免潛入房縊死

孫氏吳縣衛廷珪妻隨夫商販寓潯陽小江口寧王陷
九江廷珪適他往所親急邀孫共逃孫謂兩女金蓮玉
蓮曰我輩異鄉人汝父不在逃將安之今賊已劫鄰家
矣奈何女曰生死不相離要當為父全此身耳於是母
子共一長繩自束赴河死

江氏餘干夏璞妻正德間賊至抱方晬弟走不相脫賊
將縛之曰誠願與將軍俱顧吾父年老惟一弟幸得全
之賊以為信縱令置所抱兒出遂大聲罵賊投橋下死

後隆慶中有高明嚴氏賊掠其境隨兄出避遇賊刃及其兄女跪泣曰父早喪孀母堅守恃此一兄殺之則祀殄矣請以身代賊憫然為納刃既而欲汚之則曰請釋吾兄即配汝及兄去執不從竟剖腹而死

欽定四庫全書

明史卷三百一考證

高氏女

舊本目錄無女字

臣

章宗瀛按高氏傳首稱

高氏女且言奉翁姑甚孝及為父母合葬事甚悉蓋

婦道與女職兼盡者目錄標名宜書高氏女方協謹

據增

陶氏四節婦

臣

章宗瀛按四節婦鍾氏方氏王氏吳

氏俱適桐城陶姓目錄標名自宜書陶氏四節婦方

協舊本作鍾氏四節婦誤謹據各卷體例改

月娥傳太祖渡江之七年

臣

章宗瀛按本紀太祖渡

江事在元至正十四年五月偽漢稱帝兵自上游攻
太平事在至正二十年三月計其前後相距已七年
矣舊本作六年誤謹據改

樂城李大林妻

臣

章宗瀛按一統志作樂城李大林

妻傳脫林字謹據增

諸娥浙江山陰人

舊本作孝女諸娥山陰人

臣

章宗

瀛按明有兩山陰一浙江一山西此據通志宜加浙
江字謹增並照目錄標名節去孝女二字以符勻刻
丁氏錦孥唐方妻浙江新昌人 舊本書唐方妻浙新
昌丁氏女名錦孥 臣章宗瀛按列傳體例凡目錄標
某人則傳首亦稱某人此卷內間有於標目書某氏
而傳首復冠以某人妻殊嫌叅錯謹據體例畫一改
并於初見處聲明

貞女韓氏閩中人

臣

章宗瀛按四川通志韓氏閩中

人舊本作保寧未晰謹據改

後從玉珍破雲南還遇其叔父贖歸嫁為尹氏婦

臣

章宗瀛按四川通志韓氏自稱韓闕保後從王總兵
畧雲南還徑成都叔父贖歸以適馬氏與此互異又
按明玉珍傳玉珍將萬勝有智勇玉珍愛之使從已
姓衆呼為明二玉珍據蜀遣萬勝鄒興又李某者分
道攻雲南兩路皆不至惟勝兵深入踰年以孤軍無
繼引還不言玉珍破雲南事意當時韓氏所從或即

萬勝耳但無他書據改謹仍其舊而識之

姚孝女傳父早世迎母養於家 舊本無此二句 臣章

宗瀛按浙江通志適吳氏下有父早世迎母養於家

二語下文接入母出汲 云情事方協傳中不宜節

去謹據增

石孝女浙江新昌人 舊本無浙江二字 臣章宗瀛按

明有兩新昌一浙江一江西此據通志當作浙江謹

增

水至湯竟溺死

臣章宗瀛按一統志湯氏悉以資還

鄧族織紉自給年九十三卒與此紀異謹附考

祖斌及父兄並死王事

臣章宗瀛按太祖時斌以功

遷龍驤衛百戶父從征偽漢陷陣死子鍾襲職累功

遷指揮僉事逮文中以拒燕兵戰死子武襲職永樂

中從征交趾戰死弟文嗣襲職率舟師禦倭遭風溺

死見浙江通志謹附考

程氏

臣

章宗瀛按程氏本歙縣人家江都見江南通

志謹附考

唐貴梅者貴池人適同里朱姓

臣章宗瀛按江南通

志唐氏夫名朱彥明謹附識

張氏者嫁汪客之子

臣章宗瀛按江南通志張氏夫

名汪綬謹附識

王氏傳婦年甫十七 舊本婦作王婦口不出怨言舊

本婦作女

臣

章宗瀛按上文父母娶婦以慰之則自

以稱父為宜傳中稱王稱婦稱女殊嫌參錯謹畫一

改

王氏傳姑乃邀其二弟從容諷之 舊本云姑乃使其

二女從容諷之 臣章宗瀛按浙江通志作姑乃使人

邀其二弟從容諷之情事較協謹據改

宣氏傳孫與宣以死相要 臣章宗瀛按孫氏送夫喪

過河下求見宣宣以死相要遂同日縊死宣被救甦
而孫先死後三年宣疑父母欲嫁之乃登樓縊死時
年二十五見嘉定縣志謹附考

凌氏傳紡績供養二十年不衰

臣

章宗瀛按浙江通

志載凌氏云邑令葉竦重其節置田五畝資之傳不

載謹附識

孫氏吳縣衛廷珪妻

臣

章宗瀛按衛廷珪江南通志

作韓廷珪與此傳異謹附考

明史卷三百一考證